



Sean Yee, Alif tuai emas buat UPM

Oleh MOHAMAD FAIZAL HASHIM
sukan@utusan.com.my

JOHOR BAHRU - Universiti Putra Malaysia (UPM) menuai dua emas dalam acara lontar peluru dan lompat tinggi pada kejohanan Sukan Institusi Pendidikan Tinggi (SukIPT) di Universiti Teknologi Malaysia, di sini semalam.

Atlet negara, Yap Sean Yee, 21, memecah rekod kejohanan iaitu 1.66 meter apabila melakukan lompatan 1.75 meter sekali gus menghadiahkan emas untuk UPM.

Sean Yee menyifarkan kejayaan tersebut memberi suntikan semangat buat dirinya untuk terus mencatatkan emas dalam kejohanan yang akan disertai di masa depan.



"Untuk kejohanan ini, saya meletakkan sasaran untuk melakukan lompatan 1.75 meter dan saya merasa amat berbangga kerana mampu mencapainya."

"Kejayaan yang dikehendaki ini hasil usaha keras sejak 2011 lagi. Sasaran peribadi saya selepas ini adalah untuk memecah rekod negara pada ketinggian 1.79 meter," katanya yang akan menyertai Sukan Dalam Dewan Asia di Doha, Qatar pada 19 hingga 22 Februari ini.

Sementara itu, atlet kebangsaan, Mohamad Alif Hanif Mohd. Afandi memastikan pingat emas bagi acara lontar peluru kekal menjadi milik UPM setelah dimenangi seorang lagi atlet negara, Adi Alifuddin Hussin pada dua edisi SukIPT terdahulu.

Mohamad Alif yang melakukan lontaran 14.12 meter menyifatkan kejohanan tersebut sebagai aksi pemanas badan untuk kejohanan Sukan Universiti ASEAN (AUG) di Singapura pada Julai depan.

"Pada kejohanan AUG yang lalu, saya sekadar mendapat pingat gangsa dan pada kali ini saya menyasarkan keputusan yang lebih baik," katanya.